

穆

堂

初

稿

萬壽盛典孝德卷跋

竊惟我

皇上尊養

皇太后於茲五十二年矣懽心洽於萬國玉食徧於九州深愛
之忱久而彌篤致敬之禮進而有加如疊上
徽號以致尊崇日侍寢門以勤溫清

國有大事必躬請

懿旨以肅祗承

南巡江浙北幸熱河必奉

聖母同行以極游豫至於

王師遠指

法駕省方問安之使不絕於道遇四方獻新一瓜一果之微
必遣官星馳進奉

皇太后然後供

御定省嚴焉甘旨備焉每年十月初三日

皇太后聖誕及元旦令節

皇上必詣慈寧行禮以祝純嘏以祈萬壽莫不本於至性極
於自然所以超軼前聖昭示來茲者

起居既已詳注

典訓亦有專書矣夫聖人之福必本於德而聖人之德無

加於孝在昔惟有虞之聖五十而慕夏商以還書闕有
間周右文母已非逮養漢高翁媼禮猶草創至唐崇誕
聖之節元和十五年七月尙書左丞韋綬請降誕日詔
百官詣光順門先賀皇太后然後上皇帝壽書之史冊
光示萬古憲宗忻然嘉納至長慶元年七月降誕日百
僚於紫宸殿稱賀畢始詣昭德門外命婦於光順門並
進門奉賀皇太后典禮雖行後先失序非盛德也寶曆
初復以綬所陳奏禮無所據竟罷不行太和七年修復
祖宗故事亦不過以慶成節奉迎兩宮太后於宮中懽
宴羣臣於延英門上壽而已若我

皇上孝德天成周旋中禮

躬率羣臣先朝

皇太后然後受朝賀敬誠備至文物兼隆至於推恩錫類使年

老大臣妻率年老婦人拜舞慈寧均霑異數以

聖天子引年尙齒之文爲

皇太后臣妾億兆之樂

孝思不匱豈非聖人之極致哉孟子稱人慕父母惟少爲然

故至孝者惟舜今

皇上萬壽六旬而孺慕之誠有加無已以視五十而慕者猶

或過之豈三代而下帝者所敢望耶

臣等躬逢

盛典雖

聖孝高深仰窺無自輒紀其實傳之億萬世以見

皇上孝極其至德極其隆故福亦極其盛焉至

皇太后六旬七旬兩大慶所行典禮皆

天家盛事人倫極軌義得併書於左

萬壽盛典朝賀卷跋

臣攷周制天子之朝羣臣有四曰外朝曰中門曰內朝
日詢事諸侯之來朝亦有四春日朝夏日宗秋日覲冬
日遇若夫慶賀之制古所未詳惟大雅稱四方來賀而
繼以於萬斯年孔疏謂四方諸侯之國皆貢獻慶之又
於此得萬年之壽然則賀之爲禮惟萬壽爲宜而後世
廢闕不講漢初長樂宮成諸侯王以下至吏六百石以
上以次奉賀後漢惟歲首正月大朝受賀又以冬至陽
氣起君道長受賀至降誕之辰未有以朝賀聞者蓋功
德未底於極隆制作未臻於大備遂令此典久荒莫光

史冊其或肇置節名舉行慶賀亦不過內廷奉觴上壽
百官稽首舞蹈而已從未有薄海內外臣民耆老齊赴
闕廷嵩呼華祝如今日者欽惟

皇上德盛化神禮明樂備耿光大烈仁漸義摩丕冒出日之
鄉遠及無雷之國固已東鵜西鱓來享來王航海梯山
極於無外今恭逢

聖壽六旬集萬國之衣冠肅千官之劍佩曙光纔動曉日初
升零露濡濡惠風和暢宮房團圓之垺御爐縹緲之煙
奏韶樂於彤墀列鵷行於玉陛千旂雲擁

萬歲山呼

一人穆穆以當陽百爾雍雍而上

壽蓋自王公大臣而下至班聯寮采之餘迥異常朝實稱創
典有中外藩封入覲稱賀者若蒙古朝鮮諸臣是也有
世受

殊恩列於賓恪者若衍聖公諸臣是也有職任封疆慶祝來
京者若督撫提鎮諸臣是也有適逢引

見之期得與拜稽之列者若直省卓異文武諸臣是也有已
遂初服重覲

天顏者若致仕在籍諸臣是也有幸蒙

恩宥復廁清班者若復職諸臣是也若夫直省耆老以田里

桑麻之質當祝哽祝噎之年扶杖觀光偃僂罄折他若
士農工賈爲類不齊或來學校或自田疇或出市廛或
由工肆仰瞻

天日匍伏

闕廷莫不眉飛色舞自以幸際昌期獲觀盛事猗歟休哉
賢愚貴賤不謀而同南朔東西不期而至合萬國之歡
心成一朝之典禮所謂聖人出則日月記其初王澤深
則風俗傳其後載榮史冊其在斯乎臣等忝列班行獲
隨忭舞猥慚固陋莫罄揄揚惟紀一時之盛以補千古
朝會之所未有云爾至於朝賀諸臣自常朝王公及現

任文武官員不備書外其詣

闕祝壽臣民備載於後慶賀表文亦附見焉

萬壽盛典鑾儀卷跋

右

大駕鹵簿

行幸儀仗二通

臣

等敬記注於瞻仰之餘參以會典所載鈔

輯撰次都爲一篇竊見帝王輿服歷代相因損益可知
汗隆隨世莫不德與位稱道與器俱然未有如我

皇上之盛者也後漢書云昔者聖人興天下之大利除天下
之大害使天下之民物各得其性命是以天下之民敬
而愛之若親父母夫愛之者欲其長久不憚力役相與
起作宮室上棟下宇以雍覆之欲其長久也敬之者欲

其尊嚴不憚勞煩相與起作輪輿旌旗章表以尊嚴之
斯愛之至敬之極也蓋禮服之興所以報功章德禮曰
其功大者其樂備其治辯者其禮具德盛者縟豈誣也
哉昔人皇氏乘雲駕六羽以遊谷口堯制彤車舜鸞車
夏輅車殷大輅周人木輅加飾爲五司常掌九旗之物
各有其屬以待國事此乘輿之本可攷見者也秦平九
國兼其車服故大駕屬車八十一乘漢興乘輿大駕公
卿奉引太僕御大將軍驂乘備千乘萬騎西都行祀天
郊甘泉備之百官有其儀注名曰甘泉鹵簿東都行祠
天以法駕祠地明堂省什三祠宗廟尤省謂之小駕後

漢輿服志頗記其槩晉書益詳大駕鹵簿以象車鼓吹
列前繼以官吏導引公卿或駕駟駕三有司駕一或中
道或分左右與戟楯弓刀節鉞旌旛雜陳警蹕相沿不
改唐制七輦諸仍其舊稍加簫笳橫吹之屬宋初增日
月星辰五方四瀆諸旗史書所記凡三惟政和最爲詳
善元明因之間有增損我

國家禮備樂隆兼總百代斟酌繁簡

皇上功德崇隆參兩天地人官有宜物曲有序蓋四海九州
涵泳

恩澤五十年於茲矣敬天勤民久而彌篤或有事於

南郊或有事於

太廟孟春祈穀必躬必親四時武功不忘簡閱北平沙漠南定
河工出震向離無歲不與民相見百姓迎皮軒擁道游
望

日穀於九天見

雲旂之五色踴躍歡欣謳歌洋溢揆之古人愛敬之說其
蔑以復加矣夫愛則親焉敬則尊焉尊親之至則願見
焉今恭逢

萬壽普天同慶臣民赴

闕者信宿之間仰瞻

天仗至再至三參差掩映於綵棚之間望

盛德之光輝知

神功之赫濯百音繁會萬靈奔走其可以無記耶然則鹵簿
之陳雖職在有司初非創見而

聖人之德不見而章不動而變如日月焉歷萬古而光景常
新況乎功彰而飾煥德盛而服尊每歷十年更逢
大慶所以極臣民之愛敬者寧有涯量哉

萬壽盛典賞兵卷跋

右臣等恭紀賞兵盛典仰見

聖慮之深

聖仁之廣蓋自古有天下者莫能及也古者寓兵於農田賦
出車兵民合一其所以惠我農人者卽所以綏我士卒
自兵與民分而卹兵卹民畸重畸輕恒不得其平大約
四郊多壘則重在兵海宇宴安則重在民故幸生承平
之世民勞易見而兵獨若優游無事則轉予於卹靡所
底止者往往有之君子讀出車諸什曲寫歸戍難言之
隱而代陳其所不得已未嘗不歎古帝王矜恤軍旅之

意入人之深而感人之至後世所稀遘焉荀卿謂桓文之節制不可以敵湯武之仁義蓋文之所加者深則武之所服者遠德之所施者博則威之所制者廣三代之盛所以刑措兵寢而不用者其本末有序其施行有統也加以以意外之恩則知感齊之以一定之法則知懼蓋惟聖人首出聰明睿智神武而不殺者乃能及此亦惟享歷久長削平僭亂習知兵事乃能動爲世法震而不躡寬而不弛使武夫技擊感極而思奮也漢唐以還兵制屢更犒師勞士亦往往而有焉漢時南北兩軍悉調之農猶有古之遺意南軍取之郡國爲京城衛夫子

以季秋及歲正月行幸曲臺臨饗勸勞以農桑北軍取
之三輔爲京城衛恩賚稍殺以別中外唐府兵之制號
極善其後弊也假人爲傭冒濫不可詰開元二年命有
司大募壯士從軍引見置酒於朝堂享之乃遣薛訥等
訓練韜鈴并賜錢三千貫宋時州有屯兵者官給錢宴
犒將校謂之旬設元豐三年以新製御陣大閱八軍於
城南荆家陂賜指揮馬步諸軍銀絹有差凡此賞賜多
有與簡閱並行者而聖節恩賚波及六軍史冊所書無
聞焉惟唐時以天長節左右龍武軍各賜物千匹又眷
念舊勲獨異常倫各賜物二千匹餘各有差一時號爲

創典然而私於中遺於外規模迫陋不足侈矣我

皇上御極以來底定方隅澄清海內文思既懋聖武彌昭雖
曰守成實符創業功高於霄漢威播於要荒彰捷伐之
聲靈奠懷柔於河嶽昔年滇楚弄潢

皇上赫焉震怒命師致討六詔廓清旣而漠北蠢動豕突羊
驅乃

親御韎韐遠踰絕塞駐狼胥而鞠旅臨稽落以揚兵於是烏
孫授首沙塞蕩平此皆人謀之所不及而

聖算之所獨運者也嗣是櫓槍宵掩海波不揚而天下不復
知有兵矣願承平日久兵氣日弛國家有百年不用之

兵不可有一日不備之武

皇上天行彌健用戒用作不時飭勵武臣頻加訓練屢賜優
卹法至嚴恩至渥蓋藏至險於大順之中使天下畏威
六師知感誠所謂帝德廣運乃聖乃神乃武乃文者矣
今歲

萬壽之辰特沛恩綸覃施四海正嵩呼華祝之盛偃武修文
之日而

聖慮深遠大賚所加不忘軍士內而京師入旗所統外而直
省駐防督撫提鎮所轄綜而計之奚啻百萬悉分別等
差槩從優渥內則由都統統領給發外則分遣大臣監

賞一時材官武士歡聲雷動咸厥角叩首慶千古未逢之曠典又

命直省賞兵之臣討其軍實而簡閱之既沛之以

恩又齊之以法震而不黷寬而不弛此荷戈之士所以感激而知奮乎夫蠲租賜賑養老慈幼所以卹民也閱視戎行厚其犒賜所以卹兵也二者國之大政

皇上育之以仁正之以義悉以精神恩意流貫其間故兵與民雖分而

宸衷軫念則咸歸怙冒無一物不得其所固宜沐浴膏澤者羣戴

聖人之德而欣欣於化日之舒長也其各省督撫提鎮代題
謝

恩章奏附載十數通志士卒感戴之誠云

萬壽盛典加恩宗室卷跋

粵稽往制自唐虞三代以來所以保世而滋大者未有不加意於一本之戚以親親爲亟者也堯明德以親九族禹拜惇敘之言至於周道尤尙親親若湛露之篇燕以示慈惠厭厭夜飲在宗載考何其隆耶禮稱人道親親親親故尊祖尊祖故敬宗敬宗故收族推之以至於庶民安財用足百志成禮俗刑然後樂作可謂重矣故曰上治祖禰尊尊也下治子孫親親也旁治昆弟合族以食序以昭穆別之以禮義人道極焉所謂始於家邦終於四海理固然歟若夫以

一人降誕之祥沛九族非常之澤衍皇室之慶源煥天潢之寵藉如

皇上今日之盛尤曠古而僅見也三代而下漢懲秦弊頗芘本根文帝四年五月復諸劉有屬籍家無所與賜諸侯王子邑各二千戶元始元年以黃鵠下建章宮太液池賜宗室金錢四年始賜宗室有屬籍者爵元鳳二年賜宗室子錢人二十萬四年帝加元服復賜宗室金帛有差然皆與臣民同賜初元元年賜宗室有屬籍者馬一匹至二駟五年亦然唐武德七年四月宴王公親屬於文明殿酒闌徙坐翠華殿帝賜詩王公遞上壽賜帛各

有差宋初親親頗闕仁宗念宗族散處不親洽作睦親
廣親諸宅以族屬親疏分處之時臨幸宴享又置大宗
正司司訓導糾過失修纂譜牒圖籍以明恩其別五一
曰皇帝玉牒二曰宗支屬籍三曰宗藩慶系錄四曰仙
源積慶圖五曰仙源類譜凡錄以一歲圖以三歲譜牒
籍以十歲修纂然當時宗室猶未有爵土之封尋因富
弼之請同時封王公者九十人神宗時立宗子試法祖
免親已受命者得附鎖廳試祖免外親得附國子監試
十取五年四十累舉不第者疏名錄用而它恩數稍減
下逮元明宗族恩禮隆殺大率如此然則上下數千年

其以誕聖之節加恩宗室者槩乎其未之前聞也

國家龍興發祥長岳自

肇祖以下玉葉璇源蕃衍浩蕩

祖宗之法以帶之紅黃別親之等殺千祿百福子孫千億玉牒
不勝載矣

皇上廣錫類之仁念神明之胄視堯之親睦禹之惇敘聖揆
無二其所以篤厚本支崇獎蕃翰有加而無已者五十
有餘歲今恭逢

聖壽普天同慶愛由親始其事尤重其禮尤隆立法創制裁
自

聖心舉數千年分見岐出之恩並沛於一時豈非咸五帝登三王亘古今而立隆者乎伏觀

聖節典禮公以下蔭子奉國將軍以下各加一級非僅如元始賜爵之典也王以下間散以上

賜子周浹或蒙

宸翰輝煌或出

尙方珍異非僅如金錢帛馬之常也宗室蔭子各以應得品級隨旗上朝不必有宗子試法之煩也修明

玉牒至於宗室遺棄子女稽訪畢周咸得

賜帶記名務使萬派歸源五車同采非僅如譜牒圖錄歲修

成憲已也魯論云君子篤於親則民興於仁孟子云親親而仁民仁民而愛物蓋

皇上欲民無不興仁故於親尤篤於民物無不仁愛故先以親親推之有序施之有等固宜萬邦協和四方風動直

接於唐虞之盛也

臣

等恭逢盛典謹紀加恩宗室爲

恩賚之首云

萬壽盛典加恩外藩卷跋

右臣等撰次盛典至加恩外藩竊嘆我

國家德威之廣超越三古而

皇上深仁厚澤彌綸無外如天之無不覆如地之無不載固
宜凡有血氣者莫不尊親而

鴻庥寶祚綿於無窮也昔成周之初越裳氏以三象重譯來
獻白雉稱天無烈風時無苦雨海不揚波者三年意中
國有聖人是以來朝周公謂德澤不加君子不饗其質
政令不施君子不臣其人言雖謙讓然當時政令實未
之及也粵稽周禮職方氏辨九服之邦國五服而外極

於藩服懷方氏掌來遠方之民致方貢致遠物而送迎
之達之以節治其委積館舍飲食其禮意可謂隆洽然
不過九畿之眾耳

國家隆興之始德威遐暢雷動天隨朝鮮率先歸附蒙古
四十八部落東西數千里以次臣服盡入版圖

皇上續承鴻緒克光前烈擴乾坤之量沛雨露之恩眷念遠
人尤加軫卹使問稠疊錫予駢蕃或口外水潦冰雪寒
凍饑饉賑貸不遺餘力康熙三十五年喀爾喀爲厄魯
特所侵赫然震怒三策六飛蕩平兇逆使藩封式固若
登衽席朝鮮年貢累蒙裁減五十年復

詔禮部減白金千兩紅豹皮百四十二張又令所在修葺貢道館舍厚往薄來豈惟蒲服感

恩普天率土莫不戴高而履厚矣茲五十二年恭逢

萬壽六旬正誕蒙古五十旗集金二十萬建寺慶祝王以下台吉他布囊以上自獻歲詣

闕卽留止京師至

萬壽禮成然後返國

皇上憫物力之艱減建寺之費念淹宿之久厚餼率之供又親臨西苑

頒賜逾涯使尙方珍異震耀於遐陬文物衣冠光華於絕域

而

覃恩頒詔時別降

溫旨存問朝鮮

天語藹然有若家人婦子情深而文明氣盛而化神太和流
於四時春風被乎萬里東連鯁長西極冉駝南接雕題
北周窮髮奉冠帶祀春秋者孰不慶逢明盛涵煦於生
成之德也乎昔漢元帝時呼韓邪內附其困乏也詔雲
中五原郡轉穀二萬斛給焉唐貞觀中新羅百濟並集
京師咸遣子入侍陪臣子弟得肄業太學恩德之隆當
時稱爲僅見比觀

今日九邊而外要荒萬里侯王君長累百十國莫不稟正朔奉教令朝貢以時歲事不懈黜陟定於

天家慶讓同於內地蓋自五帝三王以來未之有也自非皇上仁至義盡湛恩汪濊物靡不得其所亦烏能使大一統之規獨隆千古也哉臣等才識短淺無能鋪張盛美祇紀其實立懷柔極則焉

萬壽盛典加恩臣工卷跋

右臣等伏讀

恩詔及前後

詔旨所以推恩臣工者何其有加而無已耶虞書頌帝德曰
臨下以簡御眾以寬又曰罰弗及嗣賞延於世罪疑惟
輕功宜爲重蓋古所以待其下者法如是其簡恩於是
其寬也自時厥後誼辟代興旁流恩澤推原古義慶洽
羣工亦往往而有焉遐稽封爵之制肇自唐虞六等之
分詳於三代姓分同異事因功德其典至隆漢承秦法
有二十等之別以褒勳舊爵止及身未嘗推恩先世唐

定九等正從神龍中始詔內外執事官三品以上及四品清官中書門下五品官父未得官者量加追贈天寶後始有封贈祖父者而李叔良以曾祖受封乃間及三世然觀宋趙概以郊祀當進階乞以封母宰相謂概方爲學士擬封不久概堅以母老乞許之後遂爲例是宋時學士以下猶不得封其父母顯親揚名蓋若是之難也加級始於西漢大夫以上賜爵一級公乘以上得移於子因有任子之恩吏二千石以上視事滿三載得任同產若子一人爲郎當時名臣若汲黯杜延年蘇武劉向等皆以任子顯至唐其法益備漢唐史列傳以門廕

入仕者皆備書之至於飭官方澄吏治三考之法黜陟
幽明慶典間行輒從寬大易所謂雷雨交作赦過宥罪
帝王之政盛德之所同也然而綜核之世每嘆屯膏驩
虞之朝濫施恩賞過與不及異世同流若夫清應長瀾
光流華渚以一人之慶普百爾之恩史冊所傳未有如
今日之盛者唐開元十八年八月以千秋節百官獻賀賜
四品以上金鏡珠囊繡綵五品以下束帛乾元元年九
月以降誕日宴百官賜絹三千匹號爲隆盛自後歷朝
聖節不過宴百僚於曲江或命中人以酒脯及仙韶樂
宣錫而已若我

皇上運協千年光被四表

絲綸渙汗中外蒙庥蓋舉聖帝明王所以加惠臣工者無所
不備遂使析圭擔爵之士並受其福上推恩於祖考下
庇賴其子孫或身擢吏議名註考功成與滌除者過無
大以視虞書所稱若合符節先聖後聖其揆一也豈不
然乎昔西漢末年除任子令宋慶曆中裁省聖節恩廕
臣等恭逢極盛載筆之餘俯仰古今乃知

湛恩汪濊千載一時凡屬臣工將何以頌揚

聖德仰荅

高深也哉因附錄大臣謝

恩疏若干篇志感頌之私於萬一焉

萬壽盛典名山祝釐卷跋

右^臣等鈔撮前後章奏撰爲二卷竊有以仰觀我

皇上聖德之厚恩澤之深而諸臣之所以祝釐者亦各有依據不違古義而非如有唐以來誕聖諸節尊崇二氏講論三教藉爲笑譁而已也昔在有虞順時之方柴燎五嶽望於山川徧於羣神故曰因名山升中於天所以昭神祇饗報功德是以災厲不作而風雨寒暑以時此天子爲天下祈福而於已無所私焉者也然而天子祭五嶽諸侯亦得祭其境內山川其奉牲以告祝史正辭將使大備盛德諸福可致之祥咸萃於一人之身康強逢

吉至於萬年永保民而後已此則天下爲天子祈福庶
幾藉一人之福以福天下者也唐張嘉貞北嶽碑銘云
事舉必祈神行宜饗則有公卿而奉告命或四時薦熟
三獻酌洗則有侯牧而奉新章其事雖殊其義豈遠乎
哉蓋五嶽視三公四瀆視諸侯名山大川百靈所會各
有擁扈一人之誼人之所奉卽神之所憑故曰寤寐靈
嶽盼獰神文玉帛未陳幽贊必先意而啟椒醑雖薄景
福乃應期而集人神所協良不誣也嘗歷稽名山之靈
風俗通稱泰山有金篋玉策探策知壽徵諸漢武華嶽
古之惇物雲笈七籤稱山頂有七葉蓮花服之長生故

曰華山韓愈稱衡山最遠而獨爲宗其神必靈北嶽所
居陰終陽始其道常久故日常山嵩山尤爲神異漢武
帝詔云朕用事華山至於中嶽御史乘屬在朝旁吏卒
咸聞呼萬歲者三乃以三百戶爲奉邑命曰崇高其他
若匡廬爲三天子鄣黃山以軒轅得名我眉五臺則文
殊普賢之所示現也武彝君慢亭之宴昉自秦漢沂山
吳嶽則東西鎮山也登蓬萊閣以望安期訪湘山寺而
知壽佛百神震疊萬方鼓舞光嶽効其靈臣庶鳴其豫
衆之所往神必據焉蓋二氏之說不足憑萬衆之心有
可恃雖謂名山祝釐之舉皇王令典以之協祚曆數昌

期以之交泰何不可者以視昔人封泰山禪梁父躬告
成功於上帝者其情之公私義之廣狹豈直相徑庭已
哉至於外藩蒙古諸部各建佛寺請

賜寺名嗒紺珠爾等經膜拜懽呼以祝

萬壽所謂不易其政不違其俗且

宸翰所加卽爲典記備載不遺以見普天同慶無間中外焉

萬壽盛典大臣入覲卷跋

在昔有虞之世肇十有二州州有牧外薄四海咸建五
長五載一巡狩羣后四朝周制春朝諸侯而圖天下之
事秋覲以比邦國之功夏宗以陳天下之謨冬遇以協
諸侯之慮侯服歲一見甸服二歲男服三歲采服四歲
衛服五歲要服六歲九州之外謂之蕃國代一見凡諸
侯入朝行三享奉束帛加璧庭實惟國所有禮畢諸侯
入廟門右北面告聽事王勞之又使宗伯以圭瓚酌鬱
鬯裸之有功者賜以車服采菽桑扈諸詩所由作也自
秦始立郡縣置守令漢仍其法諸侯王國稍叅建其中

每朝十月諸侯王以下至吏六百石以次奉賀諸侍坐
殿上者以尊卑次起上壽觴九行褚少孫云諸侯王朝
當四見始到入小見正月朔旦奉皮薦璧玉賀三日後
爲王置酒賜金錢財物後三日復入小見辭去凡留長
安不過二十日唐貞觀元年梁州都督竇軌請入朝上
曰君臣共事情猶父子朕亦須數見之間以人間風俗
許令入朝十五年詔爲諸州刺史創立邸舍於京師宋
沿五代舊制藩鎮牧伯入覲客省齋餞賜酒食大中祥
符八年四月侍衛步軍副都指揮使王能自真定來朝
宴於長春殿熙寧元年富弼以使相判汝州詔入覲許

肩輿至殿門歷代述職之常儀覲君之故事其可考見者如此我

國家建官分職中外相維文武相濟遠超前代

皇上於各省督撫提鎮

簡擇而畀以重任一德一心萬里之遠如在堂陛

臨遣之時加之以訓詞授之以方畧隆之以體貌寄之以腹
心德威所施極於無外其違

闕旣久者輒許

陛見恩禮有加獎前勳勵後效曲成而不遺故一時臣工
畏威而懷德者感厲奮興瞻仰

彤庭若戴穹蒼而親父母咸思時覲

天顏恭聆

聖訓以成泰交之盛事今歲

皇上六旬正誕薄海臣民雲集

輦下而各省大臣疏請入覲者十有五國不約而同

皇上念封疆重寄揆其遠近度其疏數分別聽許其得遂所

請者歡忻鼓舞叩

闕嵩呼仰承

聖澤或對揚

休命溫語移時或

輦轂追隨

賜予稠疊明良際會千載一時蓼蕭之詠諸侯也曰其德不爽壽考不忘天保之頌君也曰如南山之壽蓋邛隆之世天人訢合厚福奇寵徵於上下昔在五帝壽皆踰百而稷契皋陶之儔亦皆近百歲今恭逢聖壽入覲諸臣麗眉皓首錦衣繡裳拜舞于

廷陛之下

君臣相悅延歷數旬史冊所書未之有也班固賦東都稱春王三朝會同漢京受四海之圖籍膺萬國之貢珍其鋪張揚厲至於萬樂備百禮暨然不過朝儀之常爾豈若

今

萬壽聖節來王來享者如百川之朝宗如衆星之拱極六服
震疊萬里奔走爲極尊親之盛典哉臣故歷稽古來朝
覲之禮而竊慶遭逢爲獨盛云

萬壽盛典貢獻卷跋

右臣等恭紀

萬壽貢獻典禮仰覲

皇上恭儉之德慈惠之仁載稽史冊聖帝明王無與倫比者
昔虞夏之初任土作貢周官太宰以九貢制邦國之用
一曰祀貢二曰賓貢三曰器貢四曰幣貢五曰財貢六
曰貨貢七日服貢八曰旂貢九曰物貢其多寡輕重之
數一以式之所用爲準漢高帝十一年詔諸侯王通侯
及郡常以十月朝獻獻以口數率人歲六十三錢給獻
費唐時諸郡貢獻皆取當土所出准絹爲價不得過五

十正其後常貢之外或以端午或以南郊別增貢款而
誕聖之節昉自開元其初羣臣獻甘露醇酎王公戚里
進金鏡綬帶開元二十四年千秋節羣臣獻寶鏡張九
齡獨進千秋金鏡錄自是以往踵事增華漸以侈費永
泰大曆而後更極浩繁宋太祖建隆二年始詔停止後
稍稍進奉遂有定額致滋耗累乾道間至有乞蠲免聖
節貢金者較之古昔奉琛獻寶之風何其遠歟我

皇上享萬方之王食受四海之共球猶且蠲維正之供動踰
億萬減外藩之貢每至再三凡所以惠愛元元軫恤物
力者歷五十餘年如一日今恭逢

萬壽皇子皇孫上

萬年之觴效斑衣之舞山龍華蟲宗彝藻火粉米黼黻之服
無不備列珊瑚翡翠火齊木難琉璃夜光之屬無不畢
具典禮弘鉅情文該洽可不謂極盛焉若夫天潢戚畹
屬在懿親百爾臣工近居輦轂或承筐篚或駕驪黃或
就其家世所藏金石圖書足供玩御者亦皆倒篋傾笥
羅列而進至於海內臣民携持負戴相屬於道或製爲
詩歌以道揚盛美形諸圖畫以摹繪太平雖服物器用
山肴野蔌之微盡充庭實外至奉冠帶稟正朔如蒙古
朝鮮諸國稽首

闕廷畢獻方物者更不可以數計也此豈作而致之迫而應之徒侈煩費之文而繩以一定之例如唐宋以來之故事哉蓋由我

皇上德澤恩溥美利不言所以感於人心者至深且久薄海內外沕膏詠勤飲和食德歲盈五紀世逮孫曾念衣冠之榮藉耕鑿之宴安高厚覆載之不遺苟非

帝力何以致此報德之心無由自達今幸逢

萬壽之期得稍效區區之意要皆發於中之不容已動於情之不自知而并自忘其物之微且陋也乃眾志彌切

聖德愈謙凡所貢獻却而不御間蒙

聖鑒俯受一二者卽已傳爲異數震爲非常我

皇上體臣子民柔遠能邇之至意豈不亦度越千聖遠駕百王矣乎夫不殖貨利不寶遠物

聖人之德所性固然今

萬壽真獻

皇上旣已却而弗受顧載在簡編詞煩而不汰者一以徵四海尊親愛戴之誠一以著

九重恭儉慈惠之美垂示萬世傳之無窮云

丙申記注跋

欽惟

皇上體上聖之姿膺元后之位繼天而出治者五十有五年於茲矣

鴻禧贊祚固將綿於無窮然自今日觀之已爲漢唐以後所未有誠所謂咸五帝登三王上下與天地同流者猗歟休哉何其盛耶蓋依古以來帝王之福壽兼隆未有不本於德者顧帝王之德莫盛於堯舜堯舜之德備載於典謨觀古鏡今先聖後聖若合符節有不誣者堯舜之德莫大於成天平地我

皇上則道契夫雨儀心通夫三極風雷雨露必究其從山之原寒燠雨暘必使其應時來備至於窮山川之險阻測

道理之遠近上推象緯廣極扶輿莫不目營手畫灼然
而無疑此卽欽若昊天封山濬川之盛也堯舜之德莫
大於知人安民我

皇上則加意於羣工施恩於萬姓清廉之吏揚於明廷卽五
服五章之勸也貪婪之員徹於有眾卽五刑五用之懲
也

念河工難成而反覆告戒卽儆予之憂也

念雩禱必誠而日進一膳卽阻飢之懼也

念元首股肱爲一體則飲食寒暑之節咸厯於

宸衷念寇賊姦宄之宜防則東洋南洋之遙畢周於

睿慮繫獄之人暑乃暫釋軍功之將國以永存卽罰勿及嗣而賞延於世罪疑惟輕而功疑惟重也權關之苛者必除海民之奸者必禁卽懋遷之經也安南之

貢物可減朝鮮之

賜物有加卽柔遠之惠也若夫慮艱食之難奏則歲豐之賦猶蠲恐私派之累民則羨餘之進必却此又堯舜所未及行典謨所未及載所謂大而能化聖不可知者耶

皇上之功德旣賢於堯舜則

皇上之福壽遠邁於唐虞不亦宜乎而臣等謬以侍從之班得以親見斯盛載筆之餘敢敬識於簡末以見

皇上之所以合揆於堯舜者如此而又以自鳴其慶幸益萬
世而一時云

丁酉記注跋

右臣等恭紀

皇上聖德神功至五十有六年敬瞻

起居恭聆

訓旨德益以盛心益以小治益以純憂益以切舉堯舜所謂
惟危惟微惟精惟一者實有以體之於心見之於身施
之於事而治統道統萃於

一人誠足以繼天立極軼三代而垂無窮也伏記十一月二
十六日

訓旨云性理一書千言萬語不外一敬字人君治天下但能

主敬終身行之足矣大哉

王言所謂堯之欽明舜之溫恭實不外此而禹之祗承湯之聖敬文之小心翼翼武之敬勝一以貫之矣夫主敬之學惟在於能謹謹於大復謹於小然後聖功備王事全

十月三十日

訓旨云天下至大一念不謹卽貽四海之憂一日不謹卽貽數千百年之患古人雖無爲而治人主不過總其大綱然一日二日萬幾豈皆大綱乎一哉

王心此則發先儒之所未發而益非三代以下帝王所及見也我

皇上御極以來五十餘年功德之盛莫能殫紀臣等止就今歲所聞仰窺

聖心主敬之學固已謹無不謹書不勝書矣事莫大於祀

天郊壇之禮古帝王偶一舉行卽已詫爲盛事我

皇上則迎長祈穀歲必

躬親雖羣臣進節勞頤養之勸而不從也事莫大於事親帝

王之象恩義或以相掩我

皇上於

皇太后則平昔尊養之隆盡物盡志已極古今所未有而今歲
典禮重大盡哀盡敬尤爲史冊所未聞方

皇太后之違和也則張幄寢門衣不解帶迨

皇太后之賓天也則割辦致毀力疾居廬至於孝服則易紡絲而用布

尊謚則因並祔而從同此尤舊制所未能行羣工所莫能贊者自非主敬功深何以至此若夫理財用人必求其允庶獄庶愼必得其情則又無事而不加謹焉推

先帝之恩於明陵則遣親王以省視而加盜賊以嚴刑愼封守之固於邊疆則杜鄂羅斯私行之貨而謹拉賊汗觀望之心因恒風而憂旱則令臣工預求政事之宜因恒暘而慮雨則令臣民預防室廬之壞民生日眾則預籌

足食之謀師旅方興則預調防邊之將蠲租已覃於海
內猶申念於帶徵伏莽偶見於中州必推原於亂本此
孰非

皇上修己以敬推之以至安人安百姓故不賞而勸不怒而
威篤恭而天下平耶孔子曰無爲而治者其舜也歟夫
何爲哉恭己正南面而已矣以爲無爲而又必進以恭
己者以明治天下者之必主於敬也

皇上之德固已符於堯舜然伏觀十一月二十六日

訓旨云爲君之道要在安靜不必矜奇立異亦不可爲夸大
之言程子云人不學爲聖人皆自棄也此語亦太過堯

舜之後豈復有堯舜乎夫安靜卽無爲也主敬卽恭已也乃謂堯舜之後無復堯舜則

皇上之聖不自聖德益盛心益小治益純憂益切所以能爲堯舜者正在於此而主敬之學所由以成歟臣等淺陋莫能仰測

高深姑就見聞所及敷陳萬一於簡末云

書茅順甫與查近川書後

茅順甫當明中葉以古文自負其與查近川書尤爲世人所稱今復觀之詞頗跌宕有致其論退之子厚則疎謬甚矣退之與子厚蓋始終無間者觀子厚之沒以子女屬退之可以知已順甫乃謂退之由考功晉列卿嘗光顯於朝不能援子厚於綰帶而交之日而顧弔之於墓草且宿之後抑何其不考之至耶當貞元時子厚通顯而退之抑塞固無論已子厚以元和初被貶退之方浮沉下寮三爲博士作進學解自嘲固非能援引人者元和八年由博士改比部郎中史館修撰九年十月轉

考功猶省屬耳十一年正月始遷中書舍人卽以論盜殺宰相事爲李逢吉韋貫之所惡降右庶子何暇援子厚哉十二年秋裴度宣慰淮西奏退之爲行軍司馬冬淮西平復代度爲書諭王承宗承宗恐割二州遣子入侍始歸遷刑部侍郎副鄭餘慶詳定禮樂蓋十三年也明年正月卽以論佛骨得罪貶潮州而子厚亦以是年冬卒計子厚由永遷柳十四年中退之困下位者十年降庶子年餘從軍幾一年謫潮一年爲中書舍人纔四月刑部侍郎不及一歲而降謫及之其爲祭酒京兆尹兵部吏部侍郎皆在子厚沒後而顧責以不能援引是

可謂之知人論世乎學文者於韓柳猶學道者之於孔
孟當尊敬之不可橫加訾議其生平當熟悉不應茫然
不考順甫語於韓公誠無所加損而此文頗爲外間傳
誦恐復有疎謬如順甫者將信以爲實然而後世妨才
嫉能遺棄故舊之徒咸得藉口於古人則傷教害義多
矣故不可以不辨

書右軍墨池記後

人固有以小名自晦者右軍之書是也觀其以虛譚費
務資謝傳其志豈僅僅翰墨間哉記墨池者直以其書
多之抑過矣然南豐曾氏推廣其義以教人自立雖於
安西表誓墓文之旨未及闕尋發揮而與人爲善之意
固不可以或畧也夫

題庭示要言後

古來以言傳者衆矣而可信者殊寡其言存其所以言者亡也言之可信者無若家庭告誡之詞間常以此求古之人百不失一楊文公呂文清公之作是已周丈小迪爲要言以示子孫旨遠詞文稱名也小而指物也大可傳可信與楊呂之說並輒以此想見其爲人又惜天下人或不盡得見其書雖然楊呂所著皆家訓也今奉其訓者固不獨其家也然則是編也獨周氏世寶也哉

書弇州別集諸表後

表之爲體或以世或以年或以月列世年月於上而列帝王公侯於下使一覽而知某帝王之世某與同時某王公侯與某王公侯同時故謂之表弇州別集作同姓諸王表旣不分世與年徒列諸王國目於前而逐一紀其事於後謂之傳可也何謂之表高帝功臣表其謬亦然永樂以後功臣旣稱年表仍用前法功臣封襲薨除各敘其年不相聯屬顧名思義謂之年表可乎弇州自以爲上追史漢下薄唐宋其所爲如此是史記漢書未嘗涉目否則心粗氣浮雖汎覽而茫無所解徒以門閥

爵位奔走一時無識小人耳豈足與文事哉或謂雷司空列卿年表亦如王謬子獨訾王何也曰雷徒欲儔掌故而已未嘗以文章爭名於時也弇州欲爲文章巨子操敦槃執牛耳以主持斯事而世之庸人至今猶有傳會之者置而不論則其害未已且余姑就此書論其一端耳其他文理之鄙倍雖累千百簡莫能悉數此未得爲苛也

書曝書亭集後

近世人詩文標目於同姓人輒稱家某人考宋元以前文字皆無此稱凡宗族近者依輩行稱伯叔父兄弟從子等其餘雖同姓直稱其姓而已若杜詩於位韓文於重華皆其從子猶直稱姓其於疏遠可知稱家之失殆始於明之中葉耶成弘以前詩文雖才力大小氣厚薄不同要各循規矩不失唐宋人舊法至嘉靖諸人乃猖狂恣肆菲薄前賢率意杜撰今覽其所著無論文字卽一題署各款已多紕繆不可通當時最稱守古法如震川猶有州牧縣大夫諸誤若王李諸人蓋不足責也

國朝諸先輩詩文沛然復古秀水朱竹垞先生尤稱博雅
今集中稱同姓者亦曰家某人豈先生偶未檢點耶抑
先生自有據依余淺陋耳目有所未及耶或謂蘇天爵
元文類載林霽山詩有家大叅歸自北寄呈之作此家
鉉翁則堂以叅知政事充祈請使留燕十九載至至元
三十一年放歸蓋則堂姓家非霽山同姓嘉隆人心相
其所憑依或若此非所論於竹垞先生也嘉隆以後文
字今人頗知其不足法竹垞先生之詩文則今人所信
奉故附識於此以諭知其原始者得考其得失焉

書冊題跋

往讀元遺山密公寶章小集篇承平故態寶墨輝光慨然想見之今

國家重熙累洽士大夫爭托毫素之餘爲休明鼓吹至於貴胄多知學古吾友如山以

天潢近派正如庵健筆之年折節嗜學一時名宿咸敬愛之翰墨往還爲富裒所藏裝潢成冊屬題其左方歐公云物莫不聚於所好觀所聚可以知所好矣况所聚尤有不止於是者又可以量其所好也耶文字五千靈臺架構他時持貢玉堂雲間吐氣余雖才謝遺山尙能爲子

一題長句也